

友石山人遺稿
聞過齋集

全 一

蘇子卿

PDG

吳興劉氏
嘉業堂刊

友石山人遺稿敘

詩者聲之文也本于內而見于外者也仁義之發醕以正忠憤之感激以烈驕侈之言淫放僻之辭誕豈偶然之故而已哉粵自唐虞聖神以敬畏一心發而爲賡歌愼念之語成周君臣以中正一理敷而爲皇極敷言之教下迨乎三百篇之制或淪淪乎正音或末響之流變皆非有出于人心之外也戰國之閒屈平氏以其忠憤奮激之心一寓于離騷之作炎漢以降蘇武諸葛亮以其忠直義勇之氣再變爲五言之體晉淵明得其沖澹自然之趣唐少陵寓其忠君憂國之誠又豈有出于心之外哉洪武庚午余來閩郡庠生王偁奉其父友石

山人遺稿謁余請敘其首余觀其詩毋慮百餘篇而詠于感慨者極忠愛之誠得于沖淡者適山林之趣已心異之而未知其詳及取其自決一首讀之凜然如秋霜烈日之嚴毅然如泰山巖巖之象出處之分明死生之理得然後知其嘗仕于勝朝而秉義于今日故凡其所作者皆心聲之應而非苟然肱葩組華者比且徵于余向之所云者爲益信也噫觀是篇者固可以求其心尤當以景其行則可以相忘于言語之外矣于余言何有哉因其請之勤而感其辭之寓遂書以歸之山人名翰字用文友石蓋其自號也時仲春初吉前進士監察御史廬陵陳仲述敘

史廬陵陳仲述敘

友石山人遺稿

嘉業堂叢書

元靈武王翰用文著

五言古詩

送別劉子中二首

幽蘭抱貞姿結根巖石中
猗猗汎叢碧及此春露濃
君子每見取眾艸羞與同
當爲王者香揚芳待清風
撫琴起長歎曲盡情未終
執手寒江濱慷慨難爲別
豈無楊柳枝零亂不堪折
鴻雁西北來嗷嗷唳晴雪
陽和忽已暮旅況轉淒切
誰憐蘇子卿天涯持漢節

題南塘喬木圖

南塘有喬木偃蹇盤空陰始驚鸞鶴羣再聽蛟龍吟歲
暮雪霜繁感觸一何深明堂不見取老大多苦心春風
田里閒榆柳空成林按圖爲君歌聊爾寫徽音

題潮州鳶飛魚躍亭

在郡學東

虛亭倚危磯蒼莽澹無跡幽人時往來濯足坐苔石菱
荷露涓涓蒲葦風淅淅物性機盡忘上下皆自適遙峰
敞空翠落日洞深碧悠然一舒嘯造化亘今昔聖門竟
淵邃世路何逼仄古人日暮坐相憶

途中

萬物皆有托我生獨無家蔓艸野多露眇眇天之涯親
戚不在旁更與奴僕賒落日下長坂悲風捲驚沙林依

避猛虎郊行畏長蛇封狐逐野鼠跳踉當吾車村墟四五聚索莫集昏鴉方投異鄉跡又悲遠城笳撫劍向夜起中心鬱如麻微軀焉足惜天道良可嗟雲漢念乖阻道路日已遐去去復何極爲君惜年華

送鎖子堅北上

亂象旣無已中心恒不夷翩翩南林鳥厲翮無所依念子將焉如慷慨與我辭西北有名將世秉仁義麾壯哉國士心嘉會良在茲江漢有舟楫梁楚多旌旗時焉不我與言念渴與飢明良際昌運允稱平生懷

與和仲古心飲酒分韻得詩字

淵明歸去時不作兒女悲視世如浮雲出處得所宜有

酒但歡飲戚戚欲奚爲斯人不可見載歌停雲詩

題棘石圖

烈風號中林極目盡荆棘離離寒月秋莽莽古原夕冥
鴻振高翮鷦鷯翳深跡奈此貞固姿蒼茫更秋色

友漁樵者詩爲林伯景賦

至道久湮蕪浮生自勞苦鴟鴞甘鼠帶鸞鳳畏羅罟伊
人秉幽志夙昔陋珪組顧此山水閒悠然共容與短笛
入空林方舟向深渚白雲時滿襟清漪或盈屨長笑涼
風生徘徊新月吐行歌卽宇宙醉卧無今古何由升杳
冥聊復謝蟻阻

題醉道士圖

楚澤多荆榛，豈耑植瑤艸。化工運神機，何物爲醜好。形骸俱已忘，希夷卽爲寶。飄然來丹丘，相逢過蓬島。簪裳一邂逅，壺觴恣傾倒。飲爾此日醺，流予百年抱。同醉無所知，後此天地老。

寫望雲圖寄溫陵劉子中

開窻見停雲，美人別經載。以茲一時意，聊寄千里懷。暖春復深悠，悠歲云邁遲。爾浩蕩心，空山日相待。

題菊

我憶故園時，繞籬種佳菊。交葉長青葱，餘英吐芳馥。別來二十載，粲粲抱幽獨。豈無桃李顏，歲晚同草木。及茲覩餘芳，使我淚盈掬。離披已欲摧，瀟洒猶在目。雨露豈

所偏歲月不可復歸去來南山飡英坐空谷

和鄉友程氏民同會龍山留別韻

相思樂未終憂心亦何苦
翩翩鸞鶴羣牢落麋鹿伍
緬懷駕輅車伊昔事戎府
王事多險艱跋涉幾風雨
看劍思躍龍登墉氣摧虎
奈何向中道山川竟修阻
及茲展良覲澄秋碧江濤
雲山寄徜徉烟蘿暫容與
相投既不厭感慨獨懷古
長風起疏林寒色落芳渚
廣筵促鳴鵠泠然奏飛雨
雲霄浩無涯去去但凝伫

龍山月夜飲酒分韻得樹字

薄暮清興嘉涼風集高樹
須臾明月生清光在尊俎
池空河影涼石冷苔色古
列坐當前墀杯行不煩舉
野庖

具山蔬稚子薦雞黍晴峰餘靄收密竹殘露涓驚鵲翻
夜巢流螢墮前戶良時念睽離觸物感所寓坐待河影
流疏鐘遶林曙

秋懷

懸門扶桑弧丈夫四方績柰何中險艱零落苦相失涼
風天際來庭草淒以碧嗷嗷雙飛鴻宵征度寥闌物性
既如此予茲念何適寒聲在衣巾心煩百憂集美人隔
天涯佳期阻良夕鼎湖詎可招巫咸已難卽孤憤不自
聊長歌振巖石

月夜坐悠然軒有懷

明月照我懷閒窻共幽賞泠泠萬籟秋靜夜發清響山

川日修阻之子獨云往長歌耿不寐相思逖遐想

題溪山春曉圖

好山凌遠空初日散晴旭繁花點殷紅柔條媚新綠遊
魚戀芳藻鳴鳥出深谷物性適初性一覽感所觸寄謝
桃源人從茲仰芳躅

雪林爲栢上人賦

朔風生沍寒瓊瑤遍山川日夕大雨花蒼然祇樹園大
千開淨域一髮無垢氛熱惱頓銷息超然謝塵喧靈臺
澹明徹庶極真空源

七言古詩

挽迭漳州

黑雲壓城天柱折長烽夜照孤臣節劍血飛丹氣奪虹
銀章觸手紛如雪丈夫顧義不顧死秦華可摧川可竭
蕉黃荔丹酒滿壺千載漳人酹鳴咽

挽栢僉院

栢君挺挺英雄姿出佐薇省丁時危愁聞兩浙已瓦解
江南民命猶懸絲樓船一旦下江水殺氣兵氛壓城壘
大臣夙駕思棄城戰士魂銷將心死臣雖力困肝膽存
臣當殺身思報恩誓將一木支頽厦肯豎降幟登轅門
人生恩愛豈不顧詎忍貪生負天子半空煙漲樓宇紅
盡室魂飛劍光紫嗚呼氣分光嶽臣道衰賣降授節紛
陸離巍巍廊廟已如此扶持世教非公誰扶持世教非

公誰

自決

昔在潮陽我欲死宗嗣如絲我無子彼時我死作忠臣
義祀絕宗良可恥今年辟書親到門丁男屋下三人存
寸刃在手顧不惜一死了卻君親恩

五言律詩

送陳同僉

馬首出城東將軍膽氣雄旌旗明苦日笳鼓動悲風早
雪三邊恨寧誇百戰功相期春草色處處凱歌同

送張子方之江西掾史

自脫京華服知君歎索居海隅清宦在天上故人疏掛

壁空長劍探囊得素書更陪驄馬去西望復何如

和德安允恭韻

亂離傷久別愁病入新年行旆驚戎幕殘經罷講筵山
河空有恨桃李漫爭妍馬首春風裏期君早著鞭

重到龍泉寺有懷秋谷上人

舊日經行處重來倍寂寥諸天燈冉冉一徑雨瀟瀟壁
蘚經春合臺花逐夜飄不知飛錫處惆悵采蘭苕

留別古心淳上人

白社交遊少唯公卽舊知機閒同嗜酒趣合共耽詩淪
落三生話蒼茫百歲期空持匣中劍日暮竟何之

山居春暮偶成

水氣掩蒼扉。蘿香織翠微。洞迴雲到少。地僻客來稀。野鳥傷春去。楊花作雪飛。祇因飄泊久。對此也沾衣。

遊枕煙寺

石磴招提古。松蘿暝不分。排雲雙樹轉。隔水一鐘聞。林影疑殘雨。山光倚夕曛。醉來歸路遠。秋思正紛紛。

故人遂初過山居

秋氣誰相問。荒居懶閉門。劍歌雙鬢換。國步寸心存。漫寫當年事。偏驚此日魂。風流非舊日。有虱對誰捫。

題畫寄會稽胡溫

秋聲無遠近。隱處入雙松。落景明寒渚。虛煙暝遠峯。孤舟清夜遂。何處暮天鐘。不識山陰路。蒼茫翠幾重。

夜宿洪塘舟中次劉子中韻

勝地標孤塔遙津集百船岸迴孤嶼火風度隔村煙樹
色迷芳渚漁歌起暮天客愁無處寫相對未成眠

山房秋夜寄魯客

寂莫山居悄相思望轉迷江空寒雁落樹盡暮雲低生
事悲秋草交情憶剡溪西齋愁不寐風雨共淒淒

江上醉歸

江邊日日醉應被野鷗猜潦倒依芳草猖狂藉綠苔杜
陵非嗜酒彭澤豈耽杯近是飄零客愁懷強自開

聞性空居士病愈

問訊維摩室秋深病稍除翻經仍傍暖補衲乍臨虛寂